

北京市志稿(宗教志 名跡志)目錄

宗教志

卷一

釋教一 一一

卷二

釋教二 佛教寺廟 四三

卷三

釋教三 佛教寺廟表 一一二

卷四

喇嘛教一 一五七

卷五

喇嘛教二 喇嘛寺院 二二九

卷六

道教一 二五六

卷七

道教二 道教廟觀 二七六

卷八

回教 三〇一

卷九

西教 三三一

名跡志

名跡志序 三九五

卷一

名跡古物一 三九六

卷二

名跡古物二 四二〇

卷三

名跡古物三 四五三

卷四

名跡古物四 四八三

卷五

内城邸宅園林 五〇九

卷十六

城壘廢址 五三五

卷十七

鄉里今廢者 五四五

卷十八

陵墓 五五九

校勘參考書目 六四三

校勘記 六四七

北京市志稿

宗教志卷一

釋教一

後漢明帝時，佛教始入中國，當時信奉者尚少。殆至魏晉之間，士大夫迎合之以老莊之說，而佛教遂日見興盛。迄於南北朝，當時君主提倡，崇奉於上，而天下遂靡然從風，信者日衆，是為佛教全盛時代。而其傳入北京之時，實始於魏晉，而代遠年湮，已無徵於簡冊，僅於古剎叢林殘碑斷碣中偶得其鱗爪而已。京中諺曰：「先有潭柘，後有幽州。」即此可知佛教傳入幽燕之期至為渺遠，而考潭柘寺之名，在晉曰嘉福寺，其後隋唐之間所建梵宇亦所在多有。而人事滄桑，陵谷變易，徒留碎瓦頽垣與遺跡，供墨客騷人之憑弔唏噓而已。茲謹取北京釋教之見於簡策及各家雜記之可徵信者志釋教。

唐

太宗己丑 貞觀三年

閏十二月，帝念隋氏以來幽魂滯魄，詔曰：「有隋失道，九服沸騰，朕親總元戎，致茲明罰。切念九泉之下，尚淪鼎鑊，八難之間，永纏冰炭。所以樹立福田，濟其魂魄，可於建義以來交兵之處，為義士兇徒殞身滅陣者各建寺刹，招延僧侶。望法鼓所震，變炎火於青蓮；清梵所聞，易苦海於甘露。所司量定處所，並立寺宇，具為事條以聞，稱朕矜哀之意。」次年，壁壘咸置伽藍，破薛舉，幽州立昭仁寺。

丙午 貞觀二十年

帝征遼回，為陣亡將士薦度，幽州創憫忠寺。

宋

太宗甲午 淳化五年 遼聖宗 統和十二年

遼主景宗石像成，上幸延壽寺飯僧。

仁宗癸未 慶曆三年 遼興宗 重熙十一年

十二月，遼上幸延壽寺飯僧，詔宋使觀擊鞠。

南宋

高宗壬午 紹興三十二年 金 大定二年

金世宗雍正月人都於燕。以父故名宗輔改曰宗堯，追諡尊曰懿宗。建大慶壽寺於燕都城北，詔玄冥禪師顓公主之，為開山第一代，勅皇子燕王降香，賜錢二萬緡，沃田二十頃。改龍泉寺為覺山寺。

孝宗戊子 乾道四年 金 大定八年

金國十月一日詔大慶壽寺顓禪師於東京創清安禪寺，度僧五百員，作般瑟（千叱）〔于叱〕會〔一〕。

庚寅 乾道六年 金 大定十年

金國世宗真儀皇后出家為尼，建垂慶寺，度尼百人，賜田二百頃。

庚子 淳熙七年 金 大定(十四)(二十)年

金國正月勅建仰山棲隱禪寺於燕京之西山，詔玄冥禪師顓公開山，賜田設會，度僧萬人。

甲辰 淳熙十一年 金 大定二十四年

金國大長公主二月降錢三百萬建寺於燕京城，額曰「昊天」，給田百頃，每歲度僧尼十人。

光宗癸丑 紹熙四年 金 明昌四年

金詔洞宗禪師派萬松長老於內殿說法，章宗躬親迎禮，奉錦綺大僧祇衣詣座授施。后妃貴戚羅拜於前，各施珍財。建普度會，每歲設齋。後於承安二年，詔萬松禪師住西山之仰山。

寧宗丙辰 慶元二年

金國改元。十一月二十三日，大赦，度僧千員。

元

世祖甲子 至元元年

八月，拜禪僧劉秉忠為光祿大夫、太保，參領中書省事。制曰：「諸爾劉秉忠，氣剛以直，學富而文。雖晦跡於空門，每潛心於聖道。朕居藩邸，卿實賓僚，側聞高誼，餘二十年，出從遐方，幾數萬里。迨予嗣服，須汝計安，不先正名，何以壓衆？宜崇師位，兼總政機，可特授光祿大夫、太保，參領中書省事。卿其勉輔朕躬，率先乃屬，察朝夕之勤惰，審議論之是非，凡有施為，並聽裁決，佇看成績，別示寵章。」

元代禪宗與喇嘛教俱盛，蓋秉忠本屬禪僧，故於臨濟宗之宏傳稱便焉，而秉忠實出於印簡弟子可菴朗公之門下也。

丁卯 至元四年 宋 咸淳三年

佛國禪師入寂。師諱至溫，字其玉，號全一，諡佛國普安，俗姓郝。禮辨菴訥公，披荆佐無還富公，於萬壽參萬松為侍者。既而太保劉秉忠為世祖知遇，薦師。召語，大悅。將授以官，弗受，曰：「天下佛法，流臣之願，富貴非所望也。」憲宗命海雲主總

釋教，詔天下作資戎會。師持旨，宣布中外而輔成之。詔錫佛國禪師號，總攝諸路僧尼之事。師銳意衛教，僧衆賴之，後納印辭職，是年五月入寂。

乙亥 至元十二年

帝遣大臣李羅等四衆備法駕迎旃檀瑞像歸內宮，安奉萬歲山仁智殿。翰林程鉅夫《瑞像殿記》曰：「釋迦如來，初為太子，生七日，母摩耶棄世，生忉利天。佛既成道，思念母恩，遂昇忉利天，為母說法。優填國王自以久失瞻仰於如來，欲見無從，乃刻旃檀為像。目犍連尊者慮有缺陋，躬以神力攝三十二匠，昇忉利天，諦觀相好，三返乃得其真。既成，國王臣民奉之猶真佛焉。及佛自忉利天復至人間，王率臣庶同往迎佛。此像騰步空中，向佛稽首，佛為摩頂授記曰：『我滅度千年之後，汝往震旦，廣利人天。』由是西土一千二百八十五年，龜茲六十八年，涼州十四年，長安十七年，江南一百七十三年，淮南三百六十七年，復至江南二十一年，汴京一百七十七年〔三〕；北至燕京，居聖安寺十二年，北至上京大儲慶寺二十年，南還燕宮內殿，居五十四年。丁丑歲三月，燕宮火，迎還聖安寺，居今五十九年。乙亥歲，當今大元世祖皇帝至元十

二年也，帝遣大臣李羅等衆備法駕，使衛音伎迎奉萬壽山仁智殿。丁丑，建大聖〔壽〕萬安寺。己丑歲，自仁智殿迎萬安寺之後殿，大作佛事。瑞像計自優填王造始之歲，至今延祐丙辰，凡二千三百有七年。」

乙酉 至元二十二年

聖旨：「就大都大愍忠寺焚燒《道藏》偽經，命大都報恩禪寺林泉長老下火。」謝恩畢，拈香云：「佛心天子愍衆生恐墮三塗邪見，坑個裏了，無偏黨處，就中朱紫要分明。所以道聖鑒無私，天機莫測，既來頌德，敢不酬恩，此香端為祝延當今皇帝。」云：「伏願金輪與法輪並轉，福越三祇，舜日共佛日齊明，壽延億劫。」次舉火云：「憶昔當年明帝時，曾憑烈焰辨妍蚩。大元天子續《洪範》，顯正摧邪誰不知。」遂以火炬打一圓相云：「諸仁者，只如三洞靈文，還能證此火光三昧也無。若也於斯會〔德〕〔得〕〔三〕，家有《北斗經》，枉教人口不安寧。其或未然，從此灰飛烟滅後，任伊到處覓天尊，急著眼看，林泉長老從〔邁〕〔倫〕，奉勅下火。」

戊子 至元二十五年

雲峰和尚對御論禪。師住徑山。初，江淮釋教都總統楊輦真迦集江南禪教諸僧朝覲，登殿對御論禪。宣上竺僧，問講何經，答云：「《法華經》。」次問仙林僧講何經，奏云：「《百法論》。」次問師云：「禪以何為宗？」奏對曰：「禪也者，淨智妙圓體本空寂，非見聞覺知之所可知，非思量分別之所能解。」又云：「夫禪與教，本一體也。禪乃佛之心，教乃佛之語，因佛語而見佛心，譬之百川異流，同歸於海，到海則無異味」云云。謝恩。賜饌。

辛卯 至元二十八年

金太后為尼，瀛國公為僧，有地三百六十頃，例免徵租。

甲午 至元三十一年

春正月壬子朔，帝不豫。癸酉，帝崩於紫壇殿，號世祖聖德神功文武皇帝。

茲謹按《佛祖通載》所記世祖之闡揚佛教各事，錄其有關於北京釋教者。

世祖潛龍時，出征西國，好生為任，迷徑遇僧，開途受記。由是光宅天下，統御萬邦。大弘密乘，尊隆三寶，迎旃檀瑞像歸內宮，安奉萬歲山仁智殿，為現世

之寶，仍建大聖壽萬安寺供奉，令一切人俱得瞻禮。

定光佛塔毫光發現，帝命開視。內有舍利，光耀人目，由是重建寶塔。

詔講《華嚴》大德於京城大寺開演，以彰如來之富貴。帝設大會，七處放光，顯示《華嚴》七處（玄旨）〔之玄旨〕〔四〕。

帝以金為泥，命僧儒繕寫《大藏經》一藏，貯以七寶琅函，祈流傳萬世。

帝以宋朝鎮庫旃檀方圓丈餘刻為佛像，利益人天。

帝設十萬僧會，令十師對御說法，賜白金十錠，玉拄杖十根。

帝詔十高僧內殿供養。帝端居不動，諸大德亦復默然。帝乃云：「此是真實功德。」

帝印造《菩薩戒本》千部，流通散施，普令大地衆生皆奉如來寶戒。

宋太后削髮為尼，誦經修道，帝深加敬養，四事供養。宋主以王位來歸，學佛修行，帝大悅，命削髮為僧，討究大乘。宋室宮人皆削髮為尼，帝曰：「三寶中人也。」命歸學佛修行，供送衣糧。

武宗戊申 至大元年

立大承華普慶寺。

己酉 至大二年

《勅賜佛國普安禪師塔銘》，奎章閣虞集撰。

內翰趙孟頫奉勅撰《臨濟正宗碑記》。其略曰：「佛以大智慧破一切有，以大圓覺攝一切空，以大慈悲度一切衆。始於不言，而至於無所不言，而至於無言。夫道非言不傳，傳而不以言，則道在言語之外矣。是惟佛法最上上乘，如以薪傳火，薪盡，火傳不窮。海雲大師簡公性與道合，心與法宜，細無不入，大無不包，住臨濟院，能係祖傳，以正道統，佛法蓋至此而中興焉。」又云：「西雲大師安公能嗣其業，據獅子座為衆演說，聞者讚歎，信者向風，得者如寶，悟者如空。皇帝萬年，正法永傳，尚迪後人，弗昧其原。」

辛亥 至大四年

革罷僧道衙門。詔曰：「望五位以升階，轉二依而就果者，上乘菩薩也；以四向一

坐而證成三生百劫而彰號者，緣覺聲聞也。聖賢品級，教有明文，惟妙悟自心入佛知見者，千聖尚不為，何階級之有。」末云：「朝廷尚行於爵秩，釋子乃競於官階。官階無盡期，貪受無滿分。胡不養其妻子，跪拜君親，何異織女七襄牽牛負輓者哉！識達於此，無取焉。不空三藏深於大教，有功授官，猶愧濫污，今何人欲假名器哉！」

十月，賜大普慶寺金千兩，銀五千兩，鈔萬錠，西錦、綵緞、紗羅、布帛萬端，田八萬畝，邸舍四百間。皇慶二年，賜普慶寺益都田百七十頃。

仁宗乙卯 延祐二年

勅建旃檀瑞像殿，翰林承旨程鉅夫撰記。其略曰：「蓋聞道非有像，作易者必擬諸形容，法本皆空，度世者暫資於色相。謂如指空為鏡，不若以鏡而喻空；即樹占風，將使識風以忘樹。是以雙林付囑，舍利以凡聖而遍分；千輻經行，足跡亘古今而長在。非炫神通於幻境，實開方便於迷津。所謂由（佛）〔目〕以（念）〔會〕心〔五〕，即心而印佛者也。旃檀瑞像，佛之真像也，其如萬影沉江，如如不異，孤光透隙，一一皆圓。夫豈擇地而容！蓋亦隨緣而應。望梅林而止渴，靡不同沾；泛竹葉以言歸，誰堪共載？」

惟我聖天子道躋先聖，慈等覺皇。祝長樂之春秋，恒依佛地；企如來之歲月，坐閱人天。」

丁巳 延祐四年

正月，福元講主示寂。福元講主諱德謙，姓楊氏，字福元。幼為勤策，嗜誦佛書。稍長，遍歷名邦，諮訪先德，受《般若》於寧公，習《瑞應》於忠公，受《幽贊》於仙公，學《圓覺》於一公，聽《楞嚴》、《四分》於聞公，後入京都，受《華嚴》於萬安棟公。初，詔居萬寧寺，次遷〔慈〕〔崇〕恩〔六〕。前後十祀，道德簡於宸〔重〕〔衷〕，聲光揚於海外，未嘗以榮顯寵遇改其志。嘗曰：「畦衣之士抗於世表，苟不愧於朝聞夕死，尚何慕焉？」乃讓席幽居，括囊一室，處世而遺世者也。是年正月示寂。賜緡旌幢，津送塔於城之南隅云。

三月，光教律師圓寂。師諱法聞，嚴氏。十五薙染，二十受具戒，從溫公學《法華》、《般若》、《唯識》、《因明》及《四分律》。溫託以弘傳之寄。嘗對佛像灼肌燃指，庸表克誠；刺血書經，以彰重法。帝師命師講說，顧謂其徒曰：「孰謂漢〔帝〕〔地〕乃

有此僧耶〔七〕？」天子聞之，徵至庭闕，詔居大原〔教〕寺，授榮祿大夫。次遷大普慶寺，加開府儀同三司，銀章一品。王公大臣仰止高風，猶景星鳳凰之瑞於明時也。後賜「實相圓明光教律師」之號，賜遼世金書戒經，求戒者無算。是年三月，跏趺而逝。賜幣以葬，有司儀衛旌幢送之。

己未 延祐六年

妙文講主圓寂。妙文講主九歲出家，依大德圓和尚學圓頓教。始昇猊座，縱談無礙，辨若峽倒川奔。及乎閑居簡默，言不妄發。其涵養冲挹，無欲速，不躁進。世祖召見，顧謂侍臣曰：「此福德僧也。」詔居京師大寶集〔士〕〔寺〕。自爾教乘，法席益盛，性相並驅，僧俗溥濟。斯時海內講席紛紜，方膠固於名相，凝滯於殊途，師獨大弘《方等》，振以圓宗，使守株者〔融〕通於寂寞之〔外〕〔表〕，龍象蹴踏，競〔加〕〔駕〕一乘。年逾八十，專修念佛三昧。是年，結印而終。

英宗辛酉 至治元年

二月，初建西山佛寺，作仁宗神御殿於普慶寺。

弘教大師入寂。師諱了性，號大林，武氏子。初，依安和尚薙髮登具。歷諸講席，精究三藏。遇真覺國師，啟迪厥心。如柏林譚、關輔（雲）〔懷〕、南陽慈諸公，皆以賢首之學著稱一時，性悉造其門，領其玄旨。北遊燕薊，晦跡魏闕之下，悠悠如處江海之上，與世若相忘焉。成宗徵居萬寧寺，聲價震蕩內外。太后創寺於五臺山，曰大普寧寺，延師為第一代師。是年九月卒，諡弘教大師。

佛光大師入寂。師諱志德，號雲巖。十二受經於海聞和尚，習慈恩宗旨於法照禪公，盡得其蘊。至元間，世祖召見，賜宴並紫方袍，命主天禧、旌忠二刹，日講《法華》、《華嚴》、《唯識》、《金剛》等疏，特賜佛光大師之號。與七衆授戒，必令其立誓無犯。遇歲歉，煮糜粥以食餓殍數萬人。居天禧三十餘年，一衲一履，終身不易。過午不食，夜則危坐，以苦誦喪明，忽夢梵僧，迎居內院高座，空中散花，因示疾。是年二月二十七辭衆，安坐而化，世壽八十八。龕留三七，顏貌紅潤如生，闍維，舍利無數。趙孟頫作記。

癸亥 至（元）〔治〕三年

勅寫金字藏經，學士吳澄為序。曰：「上上寫經為民祈福，甚盛舉也。」

泰定帝戊辰 致和元年

設廣教總管府統攝僧衆。四月，作昭聖皇后御容殿於普慶寺。八月，遣翰林學士承旨鄂齊爾祀太祖、太宗、睿宗御容於普慶寺。

順帝辛巳 至正元年

梅屋禪師集《佛祖通載》二十二卷。師諱念常，黃姓。母楊氏禱觀音人士，夢龐眉老僧託宿而娠，生時神光照室，異香襲人。出家平江圓明院。博究群書，禮五臺。歷燕京，帝師尊寵，預金書藏經之列。乃集《佛祖通載》二十二卷，備歷代法門事跡，住持祥符，僧中班馬。

癸未 至正三年

湛堂法師入寂。師諱性澄，字湛堂，號越溪，姓孫氏。母夢日輪而生。從石門殊律師祝髮受具。深通止持作犯之義，依佛鑒鉢公習天台教觀。謁雲夢澤公，深加器重，奏復天台國清講額，遊高麗，求天台遺書。吳越大旱，師率衆說法，禱雨格應。歲饑，